

## IV. ENTIDADES LOCAIS

### CONCELLO DO IRIXO

#### *APROBACIÓN DEFINITIVA DA ORDENANZA REGULADORA DE PROTECCIÓN DOS CAMIÑOS EN RELACIÓN CON OPERACIÓNS FORESTAIS*

Aprobación definitiva da Ordenanza reguladora de protección dos camiños en relación con operacións forestais

O Pleno do Concello do Irixo, en sesión ordinaria que tivo lugar o día 2 de abril de 2024, acordou aprobar inicialmente a Ordenanza reguladora de protección dos camiños en relación con operacións forestais e expúxose ao público mediante un anuncio no taboleiro de edictos e no Boletín Oficial da Provincia de Ourense n.º 100, do 24 de maio de 2024.

Ao non presentarse reclamacións durante o prazo de exposición ao público, queda aprobada de maneira definitiva, cuxo texto íntegro se publica, en cumprimento do artigo 17.4 do Texto refundido da lei reguladora das facendas locais, aprobado polo Real decreto lexislativo 2/2004, do 5 de marzo, conforme ao seguinte teor literal:

#### “Exposición de motivos

Esta ordenanza ten como finalidade a de velar pola debida conservación dos camiños e vías públicas municipais, en relación cos danos e estragos que poden sufrir estes, como consecuencia das operacións de saca de madeira e usos equiparables, e comprenderanse dentro desta tanto as operacións preparatorias da corta de madeira como as posteriores.

Resulta tamén prioritario o interese en protexer as persoas, vivendas e outras edificacións nos supostos de incendios forestais; e para iso, é esencial que as vías de acceso ás zonas forestais se atopen sempre en perfecto estado.

Para que se cumpra isto, é primordial que as vías públicas non estean invadidas pola maleza que provén dos predios lindeiros, ou que as pólas das árbores non impidan o paso polas ditas vías, como sucede en moitos casos.

O uso dos camiños e vías públicas municipais en condicións óptimas é un dereito de toda a comunidade de usuarios, e esixe dunha intervención administrativa que regule as condicións nas que se deben realizar as operacións de saca de madeira nos montes e parcelas do concello, xa que son moi frecuentes os danos e estragos que ás veces ocasionan estas actividades nos nosos camiños.

Trátase, en definitiva, con esta ordenanza, de facer compatible a actividade de aproveitamento forestal coa preservación do medio natural, a protección paisaxística, a conservación dos camiños e a seguridade viaria.

#### Título I. Xeneralidades

#### Capítulo I. habilitación normativa

#### Artigo 1

A regulamentación por medio da presente ordenanza fundaméntase no uso das competencias que lle atribúen ao Concello os artigos 25.2d) e 84 da Lei 7/1985, do 2 de abril, reguladora das ba-



ses de réxime local; os artigos 6,80.2.d) e 286 e seguintes da Lei 5/1997, do 22 de xullo, de Administración local de Galicia; e os artigos 74 e seguintes do R.D. 1372/1986, do 13 de xuño, polo que se aproba o Regulamento de bens das corporacións locais.

## Capítulo II. Obxecto e ámbito de aplicación

### Artigo 2

Obxecto. A presente ordenanza ten por obxecto a protección e conservación dos camiños e vías públicas municipais, fronte aos danos e estragos que poden sufrir estes como consecuencia das sacas de madeira ou outros usos (susceptibles de danar as vías e camiños municipais) que se produzan dentro do termo municipal, así como a limpeza da maleza que invade as vías públicas ou cunetas, e os cerramentos das fincas, ademais de regular a construción e conservación dos salva cunetas.

### Artigo 3. Ámbito de aplicación

1. A presente ordenanza é de aplicación ás operacións de saca e outras relacionadas co ámbito forestal. Entenderase por operacións de saca de madeira a totalidade das que se desenvolvan para a obtención de madeira de tala, tanto as previas á corta de madeira (desprazamentos de vehículos e/ou maquinaria, preparación dos terreos, accesos ás fincas) como as posteriores (preparación, depósito, carga e transporte).

2. Inclúense no ámbito de aplicación desta ordenanza outras operacións ou usos susceptibles de danaren as vías e camiños municipais, valoradas polos servizos técnicos baseándose nos informes técnicos pertinentes.

3. Quedan excluídas do ámbito de aplicación desta ordenanza:

- As talas puntuais de exemplares de árbores illadas.
- As podas e refaldes en plantacións forestais.
- As talas que teñan por finalidade os aproveitamentos para uso doméstico con vehículos agrícolas
- A eliminación dunha situación de perigo para persoas ou bens.

Título II. A protección dos camiños e vías municipais fronte aos danos e estragos ocasionados como consecuencia das sacas de madeira

### Artigo 4. Comunicación previa

1. Para os efectos de garantir a preservación do medio ambiente e da conservación dos camiños e pistas municipais, é obrigatoria a comunicación de tala por parte da persoa física ou xurídica que actúe en calidade de madeireiro, cunha antelación mínima de quince días hábiles, sen prexuízo da obtención doutras autorizacións sectoriais que sexan necesarias para a tala das plantacións forestais. A comunicación realizada ao Concello do Irixo non eximirá da obriga de obter os restantes permisos e licenzas que resulten procedentes conforme á normativa sectorial.

2. Na comunicación de tala, deberá constar:

- Identificación do/a propietario/a do monte e do madeireiro, con designación do representante deste, no suposto de ser unha persoa xurídica.



- Especie de madeira obxecto da tala, así como toneladas aproximadas que se van extraer.
- Identificación nun plano do catastro ou do SIXPAC do monte afectado e referencia catastral deste, así como indicación do lugar de depósito da madeira á espera da súa saca, e, vías que e van utilizar para o transporte da madeira.
- Data prevista do inicio e remate dos traballos.
- Identificación da empresa/s encargada/s da tala, depósito, carga e transporte da madeira (razón social, NIF, vehículos cos que se van realizar as operacións de depósito, carga e transporte, así como a indicación da súa marca, modelo, segundo o modelo oficial).
- Xustificante da solicitude de permiso de tala achegado previamente ante a Consellería competente en materia forestal, segundo o modelo oficial.

– Xustificante do depósito de garantía, baseándose no regulado no artigo 6 da presente ordenanza.

3. De calquera xeito, poderase facer unha comunicación de tala para varios montes ou parcelas catastrais, cando os traballos vaian efectuarse de forma simultánea, e deberán constar nela os datos de cada unha das parcelas nas que se vaia realizar a tala. Será o madeireiro encargado da tala o responsable dos estragos ocasionados nas vías de acceso aos lugares da tala, como consecuencia tanto desta como do depósito, carga e transporte da madeira, e quedará obrigado a reparalos, incluíndo a limpeza e retirada dos restos forestais resultantes.

No suposto de non ser identificado o madeireiro, será responsable o/a propietario/a do monte ou da parcela catastral.

4. Unha vez presentada a solicitude e a documentación completa, os servizos técnicos municipais comprobarán, de acordo coa documentación achegada na comunicación previa, o estado físico dos camiños e vías que vaian ser utilizados, e obterán as fotografías que sexan pertinentes para acreditar a súa realidade física. Unha vez realizada a inspección e logo de ver o informe pertinente, o Concello comunicarlle, ao promotor, o prazo para realizar os traballos.

5. O Concello, excepcionalmente, poderá denegar ou limitar o acceso e/ou o lugar de depósito por calquera das vías ou zonas indicadas no escrito de comunicación previa, de forma motivada, tendo en conta o seu estado, a resistencia do seu firme, a súa localización, a súa utilización na data solicitada para outros fins, ou calquera outra causa xustificada.

6. No caso de que nas operacións de depósito, carga e transporte interveñan vehículos de empresas distintas á que se encarga da tala, estarán obrigados a subrogalos na súa fianza, ou ben a que a deposite a propia empresa de transporte. En caso contrario, a persoa ou empresa encargada da tala será responsable directa dos danos ocasionados nas vías públicas municipais ou a terceiros que circulen por elas como consecuencia das operacións de depósito, carga e transporte de madeira da tala.

## Artigo 5. Requisitos e obrigas

1. Son obrigas do madeireiro encargado de realizar as operacións de saca da madeira as seguintes:



- Presentar nas oficinas municipais o escrito de comunicación previa nos termos indicados no artigo anterior.
- Sinalizar as vías situadas nas zonas de extracción e lugar de depósito de madeira, conforme ao establecido na normativa vixente en materia de tráfico, circulación e seguridade viaria.
- Limpar, retirar ou eliminar os residuos procedentes da corta da madeira e das operacións de carga e almacenamento, de xeito que as pistas, camiños, cunetas ou espazos públicos queden en todo momento no mesmo estado de limpeza e conservación que tiñan antes de levarse a cabo esas operacións. Esta obriga deberá cumprirse todos os días ao final da xornada de traballo.
- Os depósitos de rolla, ramas ou podalla non poderán invadir a zona de circulación, tanto de vehículos como de persoas, nin menoscabar a funcionalidade das cunetas, bueiros, canalizacións, pontes ou calquera outra infraestrutura auxiliar ou anexa ao viario, nin supoñer risco para os usuarios da vía.
- Repor ao seu estado anterior as ramplas abertas para facilitar o acceso ás fincas ou montes.
- Responder dos danos e estragos ocasionados nos lugares da tala, vías de acceso, instalacións e demais infraestruturas, como consecuencia da realización das actividades de saca de madeira.
- As limpeza ou reparacións deberán realizarse nun prazo máximo de 7 días, a partir da retirada da madeira, ou da interrupción dos traballos antes da finalización destes.
- Deberán adoptarse as medidas oportunas para que as vías municipais, polas que se fai o transporte da madeira, estean en todo momento libres de pólas, podalla, lama ou calquera outro elemento que supoña risco para os usuarios da vía.
- Constituír a garantía a prol do Concello, conforme ao establecido no artigo 6 da presente ordenanza.

2. Non poderán levar a cabo as actividades reguladas na presente ordenanza, no ámbito do territorio do Concello do Irixo, as persoas físicas ou xurídicas que manteñan débedas derivadas de expedientes abertos en cumprimento dos preceptos da presente ordenanza ata a conclusión do expediente ou a liquidación dos importes pendentes.

3. En caso de que o madeireiro incumpra algunha das obrigas contidas na presente ordenanza, o Concello requirirao para o seu cumprimento, e outorgaralle o prazo máximo de quince días hábiles, que contarán desde o seguinte ao de recibir o requirimento.

Cando o madeireiro non puiden ser identificado, serán responsables do cumprimento desas obrigas os/as propietarios/as dos montes e/ou parcelas de que se trate.

4. O disposto no apartado anterior deste artigo enténdese sen prexuízo da imposición das sancións que correspondan polos incumprimentos desta ordenanza.

5. En ningún caso, poderán iniciarse os traballos de tala, sen contar previamente coa autorización sectorial correspondente, cando as parcelas obxecto da actuación estean afectadas pola normativa sectorial de augas, patrimonio, estradas ou calquera outra que resulte de aplicación.

6. As vías públicas non se poderán utilizar para almacenamento de madeira, aínda que se autoricen as operacións para a súa carga; solicitarase, de ser o caso, o permiso municipal corres-



pondente de ocupación de vía pública municipal, que quedará suxeito, no caso de existir, ás taxas correspondentes.

No suposto de referirse á vías de titularidade da Xunta de Galicia ou da Deputación Provincial de Ourense, con carácter previo deberá obter autorización destes organismos. Non obstante, as cunetas quedarán sempre limpas e en bo estado de utilización.

## Artigo 6. Garantías

1. A empresa madeireira, suxeita á presente ordenanza, establecerá unha fianza a favor do Concello, en calquera das formas establecidas no Texto refundido da lei de contratos do sector público, aprobado polo Real decreto lexislativo 3/2011, do 14 de novembro, co obxecto de responder ante posibles danos non reparados voluntariamente.

En ningún caso se poderán realizar as operacións de corta sen ter constituída previamente a fianza e tela depositado no Concello.

Establécense dúas categorías para os efectos de fixación de fianzas:

a) Vehículos con peso máximo autorizado inferior a 16 Tm, 1.500 € ou o correspondente seguro de responsabilidade civil por una contía non inferior a 50.000,00 €.

b) Vehículos con peso máximo autorizado igual ou maior de 16 Tm, 3.000,00 € ou o correspondente seguro de responsabilidade civil por unha contía non inferior a 75.000,00 €.

2. En caso de incumprimento, por ocasionarse estragos nas vías, servizos e infraestruturas municipais, o Concello procederá de conformidade co establecido nos apartados 3.º e 4.º do artigo 5 desta ordenanza.

Unha vez transcorrido ese prazo sen que se cumpra o requirimento, o Concello acordará a realización dos traballos que sexan necesarios, por conta do obrigado, sobre o importe da garantía depositada. Neste suposto, deberá depositar unha nova garantía para responder por futuras actuacións/operacións.

3. Cando as cantidades depositadas en concepto de garantía resulten insuficientes para sufragar os traballos mencionados no parágrafo anterior, recadarase a diferenza en concepto de ingreso de dereito público. Todo iso sen prexuízo da imposición das sancións que correspondan polo incumprimento desta ordenanza.

## Título III. Réxime sancionador

O incumprimento do disposto na presente ordenanza sancionase segundo o establecido nos seguintes artigos, ao abeiro do título XI da Lei 7/1985, do 2 de abril, reguladora das bases de réxime local. O réxime sancionador rexerese polo disposto na Lei 39/2015, do 1 de outubro, do procedemento administrativo común das administracións públicas, e na Lei 40/2015, do 1 de outubro, do réxime xurídico do sector público.

### Capítulo I

#### Infraccións

Artigo 7. As infraccións administrativas desta ordenanza tipifícanse en leves, graves e moi graves:

1. Constitúen infraccións leves:

a) Non achegar a documentación requirida antes de efectuar a tala da madeira.

b) A non comunicación da tala por parte do madeireiro no prazo sinalado.



c) O incumprimento polo/a propietario/a do monte ou parcela da obriga de identificar o madeireiro.

d) A realización de actividades reguladas na presente ordenanza, no ámbito do territorio do Concello do Irixo, polas persoas físicas ou xurídicas que manteñan débedas derivadas de expedientes abertos por incumprimento dos preceptos da presente ordenanza.

e) Calquera acción ou omisión que infrinja as disposicións desta ordenanza e non estea tipificada expresamente nela como moi grave ou grave.

f) A falta de mantemento de limpeza das cunetas.

2. Constitúen infraccións graves:

a) Actuacións que supoñan a deterioración das vías e camiños municipais.

b) Non realizar a reparación dos danos e/ ou limpeza dos restos forestais dentro do prazo sinalado de quince días hábiles, desde o seguinte ao remate ou interrupción dos traballos.

c) A realización das actividades de saca de madeira sen o previo depósito da garantía no importe que corresponda.

c) Non achegar ou falsear os datos que se esixen segundo o artigo 4 desta ordenanza dos/as técnicos/as municipais.

e) O depósito da madeira nas vías públicas e o vertido dos residuos procedentes das operacións reguladas na presente ordenanza en lugares non autorizados expresamente para iso.

f) A reincidencia na comisión de dúas infraccións leves da mesma natureza, no prazo dun ano.

3. Constitúen infraccións moi graves:

a) Actuacións de deterioración grave e relevante das vías e camiños municipais que non permitan a circulación de vehículos.

Non reparar e/ou limpar os restos forestais dentro do prazo sinalado de quince días hábiles, que contarán a partir do día seguinte da notificación do requirimento municipal.

b) Efectuar desprazamentos de terra que polas súas características deben ser considerados como movementos de terra.

c) Usar as vías públicas para almacén ou depósito de madeira de forma que supoñan un risco para os usuarios da vía.

d) A non adopción das medidas oportunas para que as vías municipais, polas que se fai o transporte de madeira estean en todo momento libres de pólas, podalla, lama ou calquera outro elemento que supoña risco para os/as usuarios/as da vía.

e) Os depósitos de rolla, pólas ou podalla que invaden a zona de circulación, tanto de vehículos como de persoas, menoscaben a funcionalidade das cunetas, bueiro, canalizacións, pontes ou calquera outra infracción ou anexa ao viario, ou supoñan risco para os/as usuarios/as da vía.

4. Sen prexuízo da sanción administrativa que se impuxese, quen infrinja a presente ordenanza terá a obriga de repoñer e restaurar as cousas ao ser e estado anteriores (reparación e limpeza) a infracción cometida e dos danos e prexuízos causados, na forma e condicións establecidas polo órgano que impuxo a sanción. Para tal fin, a resolución sancionadora determinará o contido desta obriga, así como o prazo para a súa execución.





5. A prescrición de infraccións e sancións non afectará á obriga de repoñer ou restaurar as cousas ao seu ser e estado primitivo, nin a indemnizar polos danos e perdas causados.

## Capítulo II. Sancións

### Artigo 8. Responsables

1. Serán responsables das infraccións sinaladas no artigo anterior as persoas físicas e xurídicas que as cometan.

2. Os/as propietarios/as dos montes e/ou parcelas serán responsables das infraccións de que se trate no suposto de non identificar aos madeireiros, unha vez sexan requiridos polo Concello, e unha vez transcorrido o prazo de dez días hábiles, que contarán desde o seguinte ao de recibir o requirimento.

### Artigo 9. Sancións

1. As infraccións administrativas sancionaranse con multa nas seguintes contías:

Infracción leve: serán sancionadas con multa de contía variable desde 750 € ata 1.000 €.

Infracción grave: serán sancionadas con multa de contía variable desde 751 € a 3.000 €.

Infracción moi grave: serán sancionadas con multa de contía variable desde 3.001 € a 5.000 €.

2. A imposición das sancións pecuniarias anteriormente sinaladas non eximirá os/as responsables dos feitos de repoñer a realidade física alterada, e de realizar os traballos de reparación e limpeza que para tal fin sexan sinalados na resolución que se dite.

### Disposición final. Entrada en vigor

A ordenanza comezará a rexer:

a) Se se producen reclamacións ou suxestións, resolución de todas as presentadas dentro do prazo e aprobación definitiva polo Pleno, ao abeiro do artigo 49.c) da Lei 7/1985, do 2 de abril, reguladora das bases de réxime local, e non entrará en vigor ata a publicación completa do seu texto.

b) Se non se producen reclamacións ou suxestións, entenderase definitivamente adoptado o acordo ata entón provisional, ao abeiro do artigo 49.c) da Lei 7/1985, do 2 de abril, reguladora das bases de réxime local.

c) Segundo o artigo 70.2) da Lei 7/1985, do 2 de abril, reguladora das bases de réxime local, entrará en vigor unha vez publicado o seu texto completo no Boletín Oficial da Provincia de Ourense, e unha vez transcorrido o prazo establecido no artigo 65.2) da Lei 7/1985, do 2 de abril, reguladora das bases de réxime local (quinze días hábiles).

Contra a aprobación definitiva, que pon fin á vía administrativa, os/as interesados/as poderán interpoñer o recurso contencioso-administrativo ante o órgano competente da xurisdición contencioso-administrativa, no prazo de dous meses, que contarán a partir do día seguinte ao da publicación deste acordo no Boletín Oficial da Provincia, de conformidade co artigo 46 da Lei 29/1998, do 13 de xullo, reguladora da xurisdición contencioso-administrativa."

O Irixo, 8 de xullo de 2024. A alcaldesa.

Asdo.: Susana María Iglesias Nogueira.

**R. 2.251**

